

香 光 小 錄

例言

何東夫人生西記

蓮邦之路

瑞士婦死兆

美國因果案

予之念佛方法

自然斷除肉食之方法

阿彌陀經

無量壽經(節錄)

觀無量壽佛經(節錄)

普賢行願品

發刊誌略

佛光無量 照十方國
寶池蓮華 微妙香潔
千賢萬聖 慧命同託
唯此法門 橫超最捷
懷疑不信 自失利樂
徬徨歧路 愚不可說
我今發願 施五千冊
回向先慈 以此功德

佛曆二千四百八十二年己卯著者敬題於瑞士


上海圖書館藏書



A541 212 0011 0327B

例言

- 一 本書著作人保留一切之權。
- 一 經文本應冠刊卷首以示尊重。唯恐閱者認爲經卷。擱置不閱。故權以紀事爲導引。俟再版重刊。或變更體制。
- 一 此書係著作人獨任刊資。完全分贈。而非賣品。
- 一 此係佛書。請閱畢敬存。或轉贈他人。勿毀棄或褻瀆。自陷罪戾。
- 一 本書許人翻印流通。但以書內文字爲限。其他文件非本書所載者。一概不許附入。



241704

觀經云。『觀佛身故。亦見佛心。佛心者。大慈悲是。』念佛之人。能大慈悲。卽是對佛作最大之觀。

持誦佛號。宜從容和緩。則心專神靜。若貪數目之多。則急忙而意不注。與留聲機器無異。

香光小錄

菩薩戒
優波夷
智曼呂碧城著

何東夫人生西記

香港何東爵士之德配。張蓮覺女士。夙具善根。雖處豪華。能信佛法。以鉅金建一東亞宮殿式之佛堂於香港。曰東蓮覺苑。附設佛學圖書館。及寶覺義學。爲女界研習梵行之所。育才甚盛。遠近聞風。多負笈從之。苑中一例蔬食。遵守佛制。予舊居適與比隣。所親見也。

佛學界俗例。十一月十七日慶祝阿彌陀佛誕。係因善導大師誕誤傳。然不妨定此日爲紀念彌尊之專期。全國佛徒遵行已久。多於是日起。爲七日之禪定。觀想本尊。或持誦聖號。蓋根據小本阿彌陀經。

爲生西簡捷之法。無論何日皆得舉行。經中固未定期也。夫人徇俗。每年如期守七。從未或爽。前年（丁丑）忽展緩十日。囑全苑淨衆。於是月二十七日舉行。甫滿七日之期。竟以微疾逝世。一若預知時。至特從容計算。展期以就之。既能自由解脫。則其神識所往。必爲佛國無疑。尤可徵者。當氣絕之時。衆爲同誦彌尊聖號。代求接引。少頃。一片紅光。起於足底。旋變爲白光。繞身而上。此係葉君恭綽來書所言。謂與百餘人同見。予復致函該苑監理林楞真女士。探詢詳情。亦云確曾目睹。且云。入殮時。面色轉潤。而帶笑容。肢體柔軟。頂部後冷。皆爲生西之證。

按夫人平生以德稱。而不以才著。或有訾其爲家庭中。人未脫煩惱。

者。然以信仰之誠。卽蒙彌尊接引。可見淨土法門之廣。古德所謂「萬修萬人去。」何嘗責人以艱深之學。但以戒殺茹素。及修積功德爲資糧。袁中郎所云「未有日啓鸞刀能生清泰者也。」時賢印光法師亦云。「念佛而不茹素。不能得佛法之眞實利益。」蓋佛法以大悲心爲根本。食肉是間接殺生。違反佛旨。予親見以血食之口而持誦佛號之人甚多。特爲說明於此。願修淨土者。知所勉焉。

蓮邦之路

約十載前。予寓英京倫敦。常往使署。與其祕書孫君夫婦等作樗蒲之戲。（俗名噪麻雀。）某日。孫夫人檢得印光法師之傳單。及聶雲台君之佛學小冊。作鄙夷之色。曰。「當這時代。誰還要這東西。」予

立應聲曰：「我要。」遂取而藏之。遵印法師之教，每晨持誦彌尊聖號十聲，卽所謂十念法。此爲予學佛之始。遇佛法於海外，已屬難事。況此種華文刊品，何得流入英倫。迄今猶以爲異。然儻不遇者，恐終身不皈大法。險哉。蓋予初次渡歐，因種種感觸，卽不作歸計。後雖歸國一次，亦係由聶公函勸（因由使館得其小冊，始與通訊，否則不相知也。）寓港數年，專從事譯經，不遑他顧。刊後復設法分佈各國。又忙年餘，甫告蒞事，卽遭環境之迫，重返歐洲。而歐美佛法方在研究時期，徒談哲理，於實修淨土，渺不相涉。成功殊無左券。故予之得力，仍由故國淨宗諸耆宿所指導。而追溯得失之關鍵，則在英倫。此種機遇，似有定數存焉。顧予雖習淨諦，尙未能深信不疑。暮年（卽

西曆一九三十年。值十一月十七日。俗所謂彌尊聖誕。予購菊三朵。供於聖像而祝曰。若我得生淨土者。懇佛賜以徵兆。是夜睡時。初亦亂夢紛紜。但於雜亂夢境中。忽似影片之展。清景現前。爲平闊之水。水面茸茸有物。趨近諦視。則皆蓮芽。極爲繁密。倏忽影片又換。則水中有籬或柵之類。（按此物名籬。爲劃分水界之用。杭之西湖多有之。）兩行並列。微露其端。如電車軌路。蓮葉已展大於此路式之中。予夢中自語曰。『此是誰種蓮於路中。』而於『路』字之語音。特別高重。遂醒。猛憶書間所禱。此不啻佛告我曰。汝蓮邦有路。今始萌芽耳。且此夢結構巧妙。蓋蓮爲水中植物。而路皆土石所築。故按理蓮不能生於路中。唯予所夢之路。乃在水中。由籬柵劃分水面而

成路形。故蓮得生其中也。不唯夢境巧妙。而且意義切合。又爲卽日所得之答辭。予於淨土。自此遂深信不疑矣。

附註

予初學佛時。雖每日十念。後則加多。每日至少一萬。詳見此錄中之『予之念佛方法。』

瑞士婦死兆

西曆一九三八年八月。予寓瑞士阿爾伯士山之靜怡旅館。 Hotel

Placida。 (予於去年十月。已離此旅館。遷居別處。) 其時該館主婦

斯尼特夫人 *Mrs. Schnitter* 卽業主斯尼特威廉穆之妻。因病入福

羅銳茫醫院。將受手術解剖。予以自身經驗。知解剖後。痛苦甚劇。故發同情之感。爲禱於彌尊像前。乞慈恩加被。按數珠一串。誦聖號一百零八聲畢。就榻小憩。並未成睡。但甫入朦朧之境。卽睹一現相。爲

斯尼特夫人之室門。（該旅館各室皆編有號數。彼室之門牌爲五號。其門常閉。爲予下樓必經之處。）門閉如常。而「5」字亦朗朗在目。唯燃有白燭多枝。光輝燦然。予未能斷定此兆之吉凶。迨九月間。彼由醫院返。則已愈矣。某日語予。謂能進任何食物。且適由旅館外散步而歸。予遂將所睹現相告知之。彼愀然曰：「此爲我之死兆。蓋吾瑞士風俗。人死則爲之燃燭云。」予於此種風俗。實未曾知。蓋予係外客。雖旅居瑞士。而山居閉門。諸事仍隔閡也。未幾。彼復病臥牀四個月。於次年（卽一九三九年）一月十七日逝世。予聞彼死。爲之凜然。知「心力」能通世外。真實不虛。如法華經普門品所云：「心念不空過。」以予偶爾一念。誦佛號一串。不及五分。

鐘之久。卽得感應。由此推知。吾人發願求生淨土。終身奉持。決不徒勞無益。但所慮者。福德資糧問題。是否充足耳。淨土各經。一例以修積功德。及發菩提心爲標準。煌煌大訓。豈容穿鑿曲解。別立邪說。世頗有「執持一句佛號。卽萬德圓滿。不必持戒修德。」之說。爲中外所詬病。詆及淨宗。謂違反因果律。或皆由此種謬說所累。予疊以英文書辨誣。惜不能爲國人所共見。今於此錄中。摘取淨經重要章句。附刊卷末。俾念佛者。知持名與修德。如車之雙輪。鳥之雙翼。不容偏廢。修功德而不發菩提心。已屬有漏之業。況可不修乎。或謂觀經中五逆十惡。臨命終時。遇善知識。始稱佛號。其平生並無功德。亦得往生。何歟。答曰。此輩往生。須閉蓮華中十二大劫。每劫爲一三四四。

○○○○年。（每劫約十三萬萬年有餘。）卽下品中生者亦須六劫後始生。待如此之長期。往則往矣。生則未也。吾人豈甘與逆惡之輩齊觀並論哉。下品上生者。雖七七日蓮華卽敷。唯其人臨命終時。遇善知識。爲說大乘十二部經首題名字。此事殊不易易。有人能詳說。而彼能諦聽。卽係夙世善根。恰於此際成熟。否則臨終時。痛苦昏迷。何能聽受。惡人欲生淨土。希望此種機緣。徼倖投機。成功殊無把握。仍以平時及早修積功德爲可恃也。或問吾人無力修諸功德。爲之奈何？答曰。人或無力。而「心」則人皆有之。但發菩提心及持戒可也。

美國因果案

錄西曆一九三八年十一月二十日之紐約先鋒報
NEW YORK HERALD TRIBUNE, EUROPEAN EDITION, PARIS.

女孩愛潤妮麗 Irene Lee 年六歲。於十一月十九日在密阿密城 Miami 被汽車碾斃。開車者係一黑種人。名漢瑞邁克 Henry Mike 年十九歲。被捕入獄。此女孩之父母愛爾麗 Earl Lee 夫婦入獄慰問此黑人。謂此女孩之死。乃屬命定。非開車人之咎。因其未死之前一日。告知其母。謂「夢自身被汽車碾斃。開車者是一黑種人。」愛爾麗夫婦並向法院陳述其事。代開車人求恩。請赦免其罪。

或問香光小錄。乃宏揚淨土之書。與此美國女孩之死。有何關係。而紀載之？答曰。觀無量壽佛經。其上品中生者。須「深信因果。」今麗氏夫婦。能自遏抑嬌女慘死之悲痛。而營救殺女之人。可

謂世界中之最信因果者。其道德程度之高。無與倫比。如韓昌黎所謂絕類離倫。優入聖域者也。予錄其事。以示因果之事。真確存在。雖其說尙未普遍於世界。而其事則隨處發現。有迹可尋。惜乎麗氏夫婦尙未聞佛法耳。

予之念佛方法

今之念佛者。皆以鳩摩大師所譯阿彌陀經之「執持名號」爲課本最簡便。唯此經尙有玄奘大師之譯本。名「稱讚淨土佛攝受經」。內有「若淨信諸善男子。或善女人。得聞如是無量壽佛不可思議功德名號。極樂世界莊嚴。聞已思惟。若一日夜。或二。或三。或四。或五。或六。或七。繫念不亂。……」則與觀無量壽佛經觀想之義相

近。重。在。心。想。不。僅。口。誦。萬。法。唯。心。似。心。力。重。於。口。力。又。觀。經。云。『。下。品。下。生。者。……』。如。此。愚。人。臨。命。終。時。遇。善。知。識。教。令。念。佛。彼。人。苦。逼。不。遑。念。佛。善。友。告。言。汝。若。不。能。念。彼。佛。者。應。稱。無。量。壽。佛。如。是。至。心。令。聲。不。絕。』。據。此。則。吾。人。未。至。臨。終。苦。逼。之。時。除。口。誦。外。應。兼。念。佛。（即繫念作觀）如事冗心煩之輩。不能作觀。則只誦佛號。似已具足。但須切發菩提之心耳。

放。下。萬。緣。一。心。念。佛。乃。無。上。清。福。最。爲。快。樂。予。企。慕。已。久。以。予。之。環。境。論。山。中。獨。居。一。室。終。年。無。人。來。訪。本。最。宜。禪。觀。唯。十。載。以。來。勉。學。宏。法。護。生。之。道。與。各。國。通。訊。及。譯。著。發。刊。等。事。亦。頗。忙。碌。心。實。不。甯。又。苦。一。時。難。於。結。束。故。取。簡。便。方。法。亦。只。持。名。每。日。至。少。一。萬。得。暇。

守七（俗名打七）則每日可得六七萬之數。皆心中默誦以十分之一。出聲口誦。默誦四字。出聲則六字。予個人之功課如此。未知是否合法。不敢望人皆從我。唯有可爲同人告者。『一心不亂』與否。全憑作課時間之長短。初持誦時。雜念自現。此出彼沒。莫可究詰。二小時後。始得粗定。所謂『初伏客塵煩惱』。三小時後。得入細定。四五小時後。則心澄如水。身世兩忘矣。最好勿起身動作。尤不可見人說話。郵報函札。概置不閱。只算此七日中。己身已死。但起七之前。須準備一切。將所需食用等物。購備充足。儲貯室內。蓋認定此舉之成敗。爲萬劫生死之關頭也。予昔有女傭楊氏。善坐禪念佛。亦云時間愈長愈佳。坐數小時後。得見紅光。若時短則不見。今證以『何東夫

人生西記』所述之紅光知楊氏之言爲不誣矣。

淨土諸經以普賢行願品發揮大乘之旨最爲酣暢。行者宜兼誦此品。庶免誤解淨宗。獨善其身。流近小乘之弊。觀經能助觀想。有關唯識亦宜常閱。總之淨土四經應匯合參閱。自能於此法門得圓滿之認識也。

自然斷除肉食之方法

世人信佛易而戒食肉難。印光法師云。魏君梅蓀信佛念佛而不能喫素。勸以熟讀文鈔。印光法師文集中南潯極樂寺修放生池疏數十遍。魏君從之。未及兩月。卽絕不食肉矣。以其文先說生佛心性不二。次說歷劫以來。人與動物互爲親屬。互爲怨家。互殺互報云云。其文余

雖未見其理。自不誣也。余更請食肉者。自己判斷。已身若受刀傷。雖分寸亦感劇痛。以他類之痛苦流血慘死。供我口腹之慾。其殘忍等於虎狼。天良何在。問心應生羞愧。故近世各國皆有提倡蔬食之運動。謂食肉爲野蠻生番之遺風。此爲新青年所應知。不得再以齋公齋婆鄙視之。至余個人之蔬食。已成爲自然之習慣。對蔬食甚爲滿意。絕不思念肉食。可將其經過爲閱者述之。

予之蔬食。係根據主義。固不待言。但環境亦有以成之。余居瑞士山中。初由旅館包辦蔬食。後發覺有腥羶氣。知其用葷油肉湯。乃辭去。賃廡他處。自備膳食。而山居高寒。冬季冰天雪地。欲求新鮮蔬菜。須乘火車下山購之。卽山下之市場。亦只每星期五集售一次。而山路

雪積冰滑。跬步難行。余遂不常下山。故不能每日食蔬。唯以牛乳煮「雀麥」(一種麥之名稱即 OATS) 爲常餐。若偶烹飪蔬菜一次。天寒時可供數日之食。迨春夏蔬菜多時。下山購取。以久食麥之故。乍嘗新蔬。烹以乳油醬油等。味極鮮雋。故余之戒食肉。非出於勉強。實覺蔬味甘美。認爲滿意。無食肉之必要。回憶故鄉蔬菜繁多。婦女夙主中饋。技術尤精。益以笋蕈等特產。隨意選用。較余之孤客海外。處境之難易。判若天淵。有福不知享受。耗費金錢。而啖腥羶。係被習慣所愚。欲矯正此謬誤之習慣。其法須山居一年或數月。效釋尊之居雪山。日食麻麥。久之漸進蔬菜。而後返城市。儘量食精美之素饌。自能滿意。不復思肉食矣。其不能入山者。亦可居家食粗糲一二年。

（杜詩百年粗糲腐儒餐。儒者能久餐之。佛徒豈不能暫餐乎。）始略進以淡薄之蔬菜。再歷若干時。則儘量食精美之素饌。自覺肉品腥穢不堪入口矣。此係余所發明改造「舌識」之方法。請以肉食之資每年數百元。移作他種享用。各樂其樂。各適其性。如魚龍不需林木。飛鳥不羨波濤。棄肉食如敝屣。最爲得計。更日讀佛經。俾蔬食主義益臻堅定。出生死之苦海。生極樂之蓮邦。皆基於此也。

世人或以茹素不衛生爲慮。實屬誤解。余近因病就醫。（吾病係昔年受重大解剖所致）醫囑服維他命 VITAMIN 丸。其價極昂。余函英友徵求含有維他命之蔬果名目表。彼寄示衛生小冊云。「維他命在新鮮蔬果內。分 A B C D E 五類。爲養生至寶。能治各種疾病。

幾於一切蔬果中皆有之。植物得地力之厚。陽光之暖。雨露之潤。其滋養力之偉大。豈動物之死尸所能比。食肉有害。能發生各種疾病。寄生蟲及煙酒慾。以金錢報効屠戶。菸店酒店藥店。其數總計甚鉅。最爲失策。又昔年米麥皆以石磨之。雖粗而實衛生。自碾穀之機器發明後。珍貴之滋養料盡被碾除。故今人不及古人健康。因不食粗糲故。『倫敦蔬食月刊云。』美國醫界報告。因食肉而體內繁殖寄生蟲者。已達一千七百萬。每人身內有數百萬蟲。遍佈血絡間。皆有尖銳之嘴。美國人可謂慘被蟲蝕。尤以芝加哥。紐約等埠之人。患者最多。爲世界之冠。現尙無發明能治之藥。』（余按芝加哥有最大之屠牲場。以慘殺聞於世界。寄生蟲猖獗於美國。此中殆有因

果之理。余曩見佛書謂人身之內有無數諸蟲。啣食血肉。而余疑之。今始服我佛之法眼。無微不矚也。或曰。如人身有多蟲。豈不被蟲蝕斃乎。答曰。不然。美國凱洛格醫生云。『患寄生蟲之人。其身亦發生反抗力。即特別之白血細胞。驟增多數。與蟲作戰。』縱得不死。與蟲同體共命。亦可憎之極矣。昔先慈嘗云。寓北京時。與某官之如夫人相識。其人死於蟲病。週身起包包。破則諸蛆湧出。曩聞而異之。今始知人身固有生蟲者。特彼之蟲較大。且裂膚而出耳。佛嘗教人對色身作不淨觀。而求離世。宜哉。

英國名醫金士福爾德曰。『食肉無避免寄生蟲傳染之安全辦法。患者縱能免死。亦不能除根。因無藥能醫故。』按普通人雖多不知寄生蟲。然其聞於科學界已七十餘年。尙無發明能治之藥。殆終不可救矣。

勿藐視白菜蘿蔔。其中含有至寶貴之維他命A。維他命B。能強壯神經。明目淨血。若經化學家鍊取入瓶。非重金購之不可得。且損失其本性。不如生蔬中之原料有實用也。

佛說阿彌陀經

姚秦三藏法師鳩摩羅什譯

如是我聞。一時佛在舍衛國祇樹給孤獨園。與大比丘僧千二百五十人俱。皆是大阿羅漢。衆所知識。長老舍利弗。摩訶目犍連。摩訶迦葉。摩訶迦旃延。摩訶俱絺羅。離婆多。周利槃陀伽。難陀。阿難陀。羅睺羅。憍梵波提。賓頭盧頗羅墮。迦留陀夷。摩訶劫賓那。薄拘羅。阿菟樓駄。如是等諸大弟子。并諸菩薩摩訶薩。文殊師利法王子。阿逸多菩薩。乾陀訶提菩薩。常精進菩薩。與如是等諸大菩薩。及釋提桓因等。無量諸天大衆俱。爾時佛告長老舍利弗。從是西方過十萬億佛土。有世界名曰極樂。其土有佛號阿彌陀。今現在說法。舍利弗。彼土何

故名爲極樂。其國衆生無有衆苦。但受諸樂。故名極樂。又舍利弗。極樂國土。七重欄楯。七重羅網。七重行樹。皆是四寶周匝圍繞。是故彼國名爲極樂。又舍利弗。極樂國土。有七寶池。八功德水。充滿其中。池底純以金沙布地。四邊階道。金銀琉璃玻瓈合成。上有樓閣。亦以金銀琉璃玻瓈。磑磑赤珠。瑪瑙。而嚴飾之。池中蓮華。大如車輪。青色青光。黃色黃光。赤色赤光。白色白光。微妙香潔。舍利弗。極樂國土。成就如是功德莊嚴。又舍利弗。彼佛國土。常作天樂。黃金爲地。晝夜六時。雨天曼陀羅華。其土衆生。常以清旦。各以衣祴。盛衆妙華。供養他方十萬億佛。卽以食時。還到本國。飯食經行。舍利弗。極樂國土。成就如是功德莊嚴。復次舍利弗。彼國常有種種奇妙雜色之鳥。白鶴孔雀。

鸚鵡。舍利。迦陵頻伽。共命之鳥。是諸衆鳥。晝夜六時。出和雅音。其音
演暢五根。五力。七菩提分。八聖道分。如是等法。其土衆生。聞是音已。
皆悉念佛。念法。念僧。舍利弗。汝勿謂此鳥。實是罪報所生。所以者何。
彼佛國土。無三惡道。舍利弗。其佛國土。尚無惡道之名。何況有實。是
諸衆鳥。皆是阿彌陀佛。欲令法音宣流。變化所作。舍利弗。彼佛國土。
微風吹動。諸寶行樹。及寶羅網。出微妙音。譬如百千種樂。同時俱作。
聞是音者。自然皆生念佛。念法。念僧之心。舍利弗。其佛國土。成就如
是功德莊嚴。舍利弗。於汝意云何。彼佛何故號阿彌陀。舍利弗。彼佛
光明無量。照十方國。無所障礙。是故號爲阿彌陀。又舍利弗。彼佛壽
命。及其人民。無量無邊阿僧祇劫。故名阿彌陀。舍利弗。阿彌陀佛。成

佛已來於今十劫。又舍利弗。彼佛有無量無邊聲聞弟子。皆阿羅漢。非是算數之所能知。諸菩薩衆亦復如是。舍利弗。彼佛國土成就如是功德莊嚴。又舍利弗。極樂國土衆生生者。皆是阿鞞跋致。其中多有一生補處。其數甚多。非是算數所能知之。但可以無量無邊阿僧祇說。舍利弗。衆生聞者。應當發願。願生彼國。所以者何。得與如是諸上善人。俱會一處。舍利弗。不可以少善根福德因緣。得生彼國。舍利弗。若有善男子。善女人。聞說阿彌陀佛。執持名號。若一日。若二日。若三日。若四日。若五日。若六日。若七日。一心不亂。其人臨命終時。阿彌陀佛與諸聖衆。現在其前。是人終時。心不顛倒。卽得往生阿彌陀佛。極樂國土。舍利弗。我見是利。故說此言。若有衆生。聞是說者。應當發

願生彼國土。舍利弗。如我今者。讚歎阿彌陀佛不可思議功德之利。東方亦有阿閼鞞佛。須彌相佛。大須彌佛。須彌光佛。妙音佛。如是等恆河沙數諸佛。各於其國。出廣長舌相。徧覆三千大千世界。說誠實言。汝等衆生。當信是稱讚不可思議功德一切諸佛所護念。舍利弗。南方世界。有日月燈佛。名聞光佛。大燄肩佛。須彌燈佛。無量精進佛。如是等恆河沙數諸佛。各於其國。出廣長舌相。徧覆三千大千世界。說誠實言。汝等衆生。當信是稱讚不可思議功德一切諸佛所護念。舍利弗。西方世界。有無量壽佛。無量相佛。無量幢佛。大光佛。大明佛。寶相佛。淨光佛。如是等恆河沙數諸佛。各於其國。出廣長舌相。徧覆三千大千世界。說誠實言。汝等衆生。當信是稱讚不可思議功

德一切諸佛所護念。經。舍利弗。北方世界。有燄肩佛。最勝音佛。難沮佛。日生佛。網明佛。如是等恆河沙數諸佛。各於其國。出廣長舌相。徧覆三千大千世界。說誠實言。汝等衆生。當信是稱讚不可思議功德。一切諸佛所護念。經。舍利弗。下方世界。有師子佛。名聞佛。名光佛。達摩佛。法幢佛。持法佛。如是等恆河沙數諸佛。各於其國。出廣長舌相。徧覆三千大千世界。說誠實言。汝等衆生。當信是稱讚不可思議功德。一切諸佛所護念。經。舍利弗。上方世界。有梵音佛。宿王佛。香上佛。香光佛。大燄肩佛。雜色寶華嚴身佛。娑羅樹王佛。寶華德佛。見一切義佛。如須彌山佛。如是等恆河沙數諸佛。各於其國。出廣長舌相。徧覆三千大千世界。說誠實言。汝等衆生。當信是稱讚不可思議功德。

一切諸佛所護念經。舍利弗。於汝意云何。何故名爲一切諸佛所護
念經。舍利弗。若有善男子。善女人。聞是經受持者。及聞諸佛名者。是
諸善男子。善女人。皆爲一切諸佛之所護念。皆得不退轉於阿耨多
羅三藐三菩提。是故舍利弗。汝等皆當信受我語。及諸佛所說。舍利
弗。若有人已發願。今發願。當發願。欲生阿彌陀佛國者。是諸人等。皆
得不退轉於阿耨多羅三藐三菩提。於彼國土。若已生。若今生。若當
生。是故舍利弗。諸善男子。善女人。若有信者。應當發願。生彼國土。舍
利弗。如我今者。稱讚諸佛。不可思議功德。彼諸佛等。亦稱讚我。不可
思議功德。而作是言。釋迦牟尼佛。能爲甚難希有之事。能於娑婆國
土。五濁惡世。劫濁。見濁。煩惱濁。衆生濁。命濁中。得阿耨多羅三藐三

菩提爲諸衆生說是一切世間難信之法。舍利弗當知我於五濁惡世行此難事。得阿耨多羅三藐三菩提。爲一切世間說此難信之法。是爲甚難。佛說此經已。舍利弗及諸比丘。一切世間天人阿修羅等。聞佛所說歡喜信受。作禮而去。

佛說無量壽經（節錄）

曹魏康僧鎧譯

佛告阿難。十方世界諸天人民。其有至心願生彼國。凡有三輩。其上輩者。捨家棄欲。而作沙門。發菩提心。一向專念無量壽佛。修諸功德。願生彼國。此等衆生。臨壽終時。無量壽佛與諸大衆。現其人前。卽隨彼佛往生其國。便於七寶華中。自然化生。住不退轉。智慧勇猛。神通

自在。是故阿難。其有衆生。欲於今世見無量壽佛。應發無上菩提之心。修行功德。願生彼國。

佛告阿難。其中輩者。十方世界諸天人民。其有至心願生彼國。雖不能行作沙門。大修功德。當發無上菩提之心。一向專念無量壽佛。多少修善。奉持齋戒。起立塔像。飯食沙門。懸繒然燈。散華燒香。以此迴向。願生彼國。其人臨終。無量壽佛化現其身。光明相好。具如眞佛。與諸大衆。現其人前。卽隨化佛往生其國。住不退轉。功德智慧。次如上輩者也。

佛告阿難。其下輩者。十方世界諸天人民。其有至心欲生彼國。假使不能作諸功德。當發無上菩提之心。一向專意。乃至十念。念無量壽

佛願生其國。若聞深法。歡喜信樂。不生疑惑。乃至一念念於彼佛。以至誠心願生其國。此人臨終。夢見彼佛。亦得往生。功德智慧。次如中輩者也。

比丘白佛。

敬按比丘卽法藏比丘。阿彌陀佛之前身。對世自在王佛發四十八願。

唯垂聽察。如我所願。

當具說之。設我得佛。國有地獄。餓鬼。畜生者。不取正覺。設我得佛。國中天人壽終之後。復更三惡道者。不取正覺。設我得佛。國中天人。不悉眞金色者。不取正覺。設我得佛。國中天人。形色不同。有好醜者。不取正覺。設我得佛。國中天人。不識宿命。下至知百千億那由他諸劫。事者。不取正覺。設我得佛。國中天人。不得天眼。下至見百千億那由他諸佛國者。不取正覺。設我得佛。國中天人。不得天耳。下至聞百千

億那由他諸佛所說。不悉受持者。不取正覺。設我得佛。國中天人。不得見他心智。下至知百千億那由他諸佛國中衆生心念者。不取正覺。設我得佛。國中天人。不得神足。於一念頃。下至不能超過百千億那由他諸佛國者。不取正覺。設我得佛。國中天人。若起想念貪計身者。不取正覺。設我得佛。國中天人。不住定聚。必至滅度者。不取正覺。設我得佛。光明有限量。下至不照百千億那由他諸佛國者。不取正覺。設我得佛。壽命有限量。下至百千億那由他劫者。不取正覺。設我得佛。國中聲聞。有能計量。乃至三千大千世界衆生。悉成緣覺。於百千劫。悉共計校。知其數者。不取正覺。設我得佛。國中天人。壽命無能限量。除其本願。修短自在。若不爾者。不取正覺。設我得佛。國中天人。

乃至聞有不善名者。不取正覺。設我得佛。十方世界無量諸佛。不悉咨嗟稱我名者。不取正覺。設我得佛。十方衆生。至心信樂。欲生我國。乃至十念。若不生者。不取正覺。唯除五逆。誹謗正法。設我得佛。十方衆生。發菩提心。修諸功德。至心發願。欲生我國。臨壽終時。假令不與大衆圍繞。現其人前者。不取正覺。設我得佛。十方衆生。聞我名號。繫念我國。植衆德本。至心迴向。欲生我國。不果遂者。不取正覺。設我得佛。佛國中天人。不悉成滿三十二大人相者。不取正覺。設我得佛。他方佛土諸菩薩衆。來生我國。究竟必至一生補處。除其本願自在所化。爲衆生故。被弘誓鎧。積累德本。度脫一切。遊諸佛國。修菩薩行。供養十方諸佛如來。開化恆沙無量衆生。使立無上正眞之道。超出常倫。

諸地之行。現前修習普賢之德。若不爾者。不取正覺。設我得佛。國中菩薩承佛神力。供養諸佛。一食之頃。不能徧至無數無量億那由他諸佛國者。不取正覺。設我得佛。國中菩薩在諸佛前。現其德本。諸所求欲供養之具。若不如意者。不取正覺。設我得佛。國中菩薩不能演說一切智者。不取正覺。設我得佛。國中菩薩不得金剛那羅延身者。不取正覺。設我得佛。國中天人一切萬物。嚴淨光麗。形色殊特。窮微極妙。無能稱量。其諸衆生。乃至逮得天眼。有能明了。辯其名數者。不取正覺。設我得佛。國中菩薩。乃至少功德者。不能知見其道場樹。無量光色。高四百萬里者。不取正覺。設我得佛。國中菩薩。若受讀經法。諷誦持說。而不得辯才智慧者。不取正覺。設我得佛。國中菩薩。智慧

辯才若可限量者。不取正覺。設我得佛。國土清淨。皆悉照見十方一切無量無數不可思議諸佛世界。猶如明鏡。覩其面像。若不爾者。不取正覺。設我得佛。自地以上。至於虛空。宮殿樓觀。池流華樹。國土所有一切萬物。皆以無量雜寶百千種香。而共合成。嚴飾奇妙。超諸天人。其香普熏十方世界。菩薩聞者。皆修佛行。若不如是。不取正覺。設我得佛。十方無量不可思議諸佛世界衆生之類。蒙我光明觸其身者。身心柔軟。超過天人。若不爾者。不取正覺。設我得佛。十方無量不可思議諸佛世界衆生之類。聞我名字。不得菩薩無生法忍。諸深總持者。不取正覺。設我得佛。十方無量不可思議諸佛世界。其有女人。聞我名字。歡喜信樂。發菩提心。厭惡女身。壽終之後。復爲女像者。不

取正覺。設我得佛。十方無量不可思議諸佛世界諸菩薩衆。聞我名字。壽終之後。常修梵行。至成佛道。若不爾者。不取正覺。設我得佛。十方無量不可思議諸佛世界諸天人民。聞我名字。五體投地。稽首作禮。歡喜信樂。修菩薩行。諸天世人。莫不致敬。若不爾者。不取正覺。設我得佛。國中天人。欲得衣服。隨念卽至。如佛所讚應法妙服。自然在身。有求裁縫。擣染浣濯者。不取正覺。設我得佛。國中天人。所受快樂。不如漏盡比丘者。不取正覺。設我得佛。國中菩薩。隨意欲見十方無量嚴淨佛土。應時如願。於寶樹中。皆悉照見。猶如明鏡。覩其面像。若不爾者。不取正覺。設我得佛。他方國土諸菩薩衆。聞我名字。至於得佛。諸根缺陋。不具足者。不取正覺。設我得佛。他方國土諸菩薩衆。聞

我名字。皆悉逮得清淨解脫三昧。住是三昧。一發意頃。供養無量。不可思議諸佛世尊。而不失定意。若不爾者。不取正覺。設我得佛。他方國土諸菩薩衆。聞我名字。壽終之後。生尊貴家。若不爾者。不取正覺。設我得佛。他方國土諸菩薩衆。聞我名字。歡喜踊躍。修菩薩行。具足德本。若不爾者。不取正覺。設我得佛。他方國土諸菩薩衆。聞我名字。皆悉逮得普等三昧。住是三昧。至於成佛。常見無量不可思議一切諸佛。若不爾者。不取正覺。設我得佛。國中菩薩。隨其志願。所欲聞法。自然得聞。若不爾者。不取正覺。設我得佛。他方國土諸菩薩衆。聞我名字。不即得至不退轉者。不取正覺。設我得佛。他方國土諸菩薩衆。聞我名字。不即得至第一忍。第二第三法忍。於諸佛法。不能即得不退轉者。不取正覺。

觀無量壽佛經（節錄）

劉宋西域三藏法師罽良耶舍譯

欲生彼國者。當修三福。一者。孝養父母。奉事師長。慈心不殺。修十善業。二者。受持三歸。具足衆戒。不犯威儀。三者。發菩提心。深信因果。讀誦大乘。勸進行者。如此三事。名爲淨業。佛告韋提希。汝今知不。此三種業。乃是過去未來現在三世諸佛淨業正因。

佛告阿難。及韋提希。上品上生者。若有衆生。願生彼國者。發三種心。即便往生。何等爲三。一者。至誠心。二者。深心。三者。迴向發願心。具三心者。必生彼國。復有三種衆生。當得往生。何等爲三。一者。慈心不殺。具諸戒行。二者。讀誦大乘方等經典。三者。修行六念。迴向發願。願生

彼國具此功德。一日乃至七日。即得往生。生彼國時。此人精進勇猛。故阿彌陀如來。與觀世音。大勢至。無數化佛。百千比丘。聲聞大衆。無量諸天。七寶宮殿。觀世音菩薩。執金剛臺。與大勢至菩薩。至行者前。阿彌陀佛。放大光明。照行者身。與諸菩薩。授手迎接。觀世音。大勢至。與無數菩薩。讚歎行者。勸進其心。行者見已。歡喜踊躍。自見其身。乘金剛臺。隨從佛後。如彈指頃。往生彼國。生彼國已。見佛色身。衆相具足。見諸菩薩。色相具足。光明寶林。演說妙法。聞已。即悟無生法忍。經須臾間。歷事諸佛。徧十方界。於諸佛前。次第受記。還至本國。得無量百千陀羅尼門。是名上品上生者。上品中生者。不必受持讀誦方等經典。善解義趣。於第一義。心不驚動。深信因果。不謗大乘。以此功德。

迴向願求生極樂國。行此行者。命欲終時。阿彌陀佛。與觀世音。大勢。至無量大衆。眷屬圍繞。持紫金臺。至行者前。讚言。法子。汝行大乘。解第一義。是故我今來迎接汝。與千化佛。一時授手。行者自見坐紫金臺。合掌叉手。讚歎諸佛。如一念頃。卽生彼國七寶池中。此紫金臺。如大寶華。經宿則開。行者身作紫磨金色。足下亦有七寶蓮華。佛及菩薩。俱時放光照行者身。目卽開明。因前宿習。普聞衆聲。純說甚深第一義諦。卽下金臺。禮佛合掌。讚歎世尊。經於七日。應時卽於阿耨多羅三藐三菩提。得不退轉。應時卽能飛行徧至十方。歷事諸佛。於諸佛所。修諸三昧。經一小劫。得無生忍。現前受記。是名上品中生者。上品下生者。亦信因果。不謗大乘。但發無上道心。以此功德。迴向願求。

生極樂國。行者命欲終時。阿彌陀佛。及觀世音。大勢至。與諸菩薩。持金蓮華。化作五百佛。來迎此人。五百化佛。一時授手。讚言。法子。汝今清淨。發無上道心。我來迎汝。見此事時。卽自見身。坐金蓮華。坐已華合。隨世尊後。卽得往生七寶池中。一日一夜。蓮華乃開。七日之中。乃得見佛。雖見佛身。於衆相好。心不明了。於三七日後。乃了了見。聞衆音聲。皆演妙法。遊歷十方。供養諸佛。於諸佛前。聞甚深法。經三小劫。得百法明門。住歡喜地。是名上品下生者。是名上輩生想。名第十四觀。

佛告阿難。及韋提希。中品上生者。若有衆生。受持五戒。持八戒齋。修行諸戒。不造五逆。無衆過患。以此善根。迴向願求生於西方極樂世。

界。臨命終時。阿彌陀佛。與諸比丘。眷屬圍繞。放金色光。至其所。演說苦空無常無我。讚歎出家。得離衆苦。行者見已。心大歡喜。自見己身。坐蓮華臺。長跪合掌。爲佛作禮。未舉頭頃。卽得往生極樂世界。蓮華尋開。當華敷時。聞衆音聲。讚歎四諦。應時卽得阿羅漢道。三明六通。具八解脫。是名中品上生者。中品中生者。若有衆生。若一日一夜持八戒齋。若一日一夜持沙彌戒。若一日一夜持具足戒。威儀無缺。以此功德。迴向願求生極樂國。戒香熏修。如此行者。命欲終時。見阿彌陀佛。與諸眷屬。放金色光。持七寶蓮華。至行者前。行者自聞空中有聲。讚言。善男子。如汝善人。隨順三世諸佛教。故我來迎汝。行者自見坐蓮華上。蓮華卽合。生於西方極樂世界。在寶池中。經於七日。蓮

華乃敷。華既敷已。開目合掌。讚歎世尊。聞法歡喜。得須陀洹。經半劫已。成阿羅漢。是名中品中生者。中品下生者。若有善男子。善女人。孝養父母。行世仁慈。此人命欲終時。遇善知識。爲其廣說阿彌陀佛國土樂事。亦說法藏比丘四十八願。聞此事已。尋卽命終。譬如壯士屈伸臂頃。卽生西方極樂世界。經七日已。遇觀世音及大勢至。聞法歡喜。得須陀洹。過一小劫。成阿羅漢。是名中品下生者。是名中輩生。想名第十五觀。

佛告阿難。及韋提希。下品上生者。或有衆生。作衆惡業。雖不誹謗方等經典。如此愚人。多造惡法。無有慚愧。命欲終時。遇善知識。爲說大乘十二部經首題名字。以聞如是諸經名故。除卻千劫極重惡業。智

者復教合掌叉手稱南無阿彌陀佛。稱佛名故。除五十億劫生死之罪。爾時彼佛。卽遣化佛。化觀世音。化大勢至。至行者前。讚言善男子。以汝稱佛名故。諸罪消滅。我來迎汝。作是語已。行者卽見化佛光明。徧滿其室。見已歡喜。卽便命終。乘寶蓮華。隨化佛後。生寶池中。經七七日。蓮華乃敷。當華敷時。大悲觀世音菩薩。及大勢至菩薩。放大光明。住其人前。爲說甚深十二部經。聞已信解。發無上道心。經十小劫。具百法明門。得入初地。是名下品上生者。佛告阿難。及韋提希。下品中生者。或有衆生。毀犯五戒。八戒。及具足戒。如此愚人。偷僧祇物。盜現前僧物。不淨說法。無有慚愧。以諸惡業。而自莊嚴。如此罪人。以惡業故。應墮地獄。命欲終時。地獄衆火。一時俱至。遇善知識。以大慈悲。

卽爲讚說阿彌陀佛十力威德。廣讚彼佛光明神力。亦讚戒定慧解脫。解脫知見。此人聞已。除八十億劫生死之罪。地獄猛火。化爲清涼風。吹諸天華。華上皆有化佛菩薩。迎接此人。如一念頃。卽得往生七寶池中蓮華之內。經於六劫。蓮華乃敷。觀世音大勢至。以梵音聲安慰彼人。爲說大乘甚深經典。聞此法已。應時卽發無上道心。是名下品中生者。佛告阿難。及韋提希。下品下生者。或有衆生。作不善業。五逆十惡。具諸不善。如此愚人。以惡業故。應墮惡道。經歷多劫。受苦無窮。如此愚人。臨命終時。遇善知識。種種安慰。爲說妙法。教令念佛。彼人苦逼。不遑念佛。善友告言。汝若不能念彼佛者。應稱無量壽佛。如是至心。令聲不絕。具足十念。稱南無阿彌陀佛。稱佛名故。於念念中。

除八十億劫生死之罪。命終之時。見金蓮華。猶如日輪。住其人前。如一念頃。卽得往生極樂世界。於蓮華中。滿十二大劫。蓮華方開。觀世音大勢至。以大悲音聲。爲其廣說諸法實相。除滅罪法。聞已歡喜。應時卽發菩提之心。是名下品下生者。是名下輩生想。名第十六觀。

大方廣佛華嚴經普賢菩薩行願品

唐闍賓國三藏般若奉詔譯

爾時普賢菩薩摩訶薩。稱歎如來勝功德已。告諸菩薩及善財言。善男子。如來功德。假使十方一切諸佛。經不可說不可說佛刹極微塵數劫。相續演說。不可窮盡。若欲成就此功德門。應修十種廣大行願。何等爲十一者。禮敬諸佛。二者稱讚如來。三者廣修供養。四者懺悔

業障。五者隨喜功德。六者請轉法輪。七者請佛住世。八者常隨佛學。九者恆順衆生。十者普皆迴向。善財白言。大聖。云何禮敬。乃至迴向。普賢菩薩告善財言。善男子。言禮敬諸佛者。所有盡法界。虛空界。十方三世一切佛刹。極微塵數。諸佛世尊。我以普賢行願力故。深信解。如對目前。悉以清淨身語意業。常修禮敬。一一佛所。皆現不可說不可說佛刹。極微塵數身。一一身。徧禮不可說不可說佛刹。極微塵數佛。虛空界盡。我禮乃盡。以虛空界不可盡故。我此禮敬。無有窮盡。如是乃至衆生界盡。衆生業盡。衆生煩惱盡。我禮乃盡。而衆生界乃至煩惱。無有盡故。我此禮敬。無有窮盡。念念相續。無有閒斷。身語意業。無有疲厭。

復次善男子。言稱讚如來者。所有盡法界虛空界。十方三世一切刹土。所有極微一一塵中。皆有一切世間極微塵數佛。一一佛所。皆有菩薩海會圍繞。我當悉以甚深勝解。現前知見。各以出過辯才。天女微妙舌根。一一舌根。出無盡音聲海。一一音聲。出一切言辭海。稱揚讚歎一切如來諸功德海。窮未來際。相續不斷。盡於法界。無不周徧。如是虛空界盡。衆生界盡。衆生業盡。衆生煩惱盡。我讚乃盡。而虛空界乃至煩惱。無有盡故。我此讚歎。無有窮盡。念念相續。無有閒斷。身語意業。無有疲厭。

復次善男子。言廣修供養者。所有盡法界虛空界。十方三世一切佛刹。極微塵中。一一各有一切世界極微塵數佛。一一佛所。種種菩薩。

海會圍繞。我以普賢行願力故。起深信解。現前知見。悉以上妙諸供養具。而爲供養。所謂華雲鬘雲。天音樂雲。天傘蓋雲。天衣服雲。天種種香。塗香。燒香。末香。如是等雲。一一量如須彌山王。然種種燈。酥燈。油燈。諸香油燈。一一燈炷如須彌山。一一燈油如大海水。以如是等諸供養具。常爲供養。善男子。諸供養中。法供養最。所謂如說修行供養。利益衆生供養。攝受衆生供養。代衆生苦供養。勤修善根供養。不捨菩薩業供養。不離菩提心供養。善男子。如前供養無量功德。比法供養一念功德。百分不及一。千分不及一。百千俱胝那由他分。迦羅分。算分。數分。喻分。優波尼沙陀分。亦不及一。何以故。以諸如來尊重法故。以如說行。出生諸佛故。若諸菩薩行法供養。則得成就供養如

來。如是修行。是真供養故。此廣大最勝供養。虛空界盡。衆生界盡。衆生業盡。衆生煩惱盡。我供乃盡。而虛空界乃至煩惱不可盡故。我此供養亦無有盡。念念相續。無有閒斷。身語意業。無有疲厭。

復次善男子。言懺悔業障者。菩薩自念。我於過去無始劫中。由貪瞋癡。發身口意。作諸惡業。無量無邊。若此惡業有體相者。盡虛空界不能容受。我今悉以清淨三業。徧於法界極微塵刹。一切諸佛菩薩衆前。誠心懺悔。後不復造。恆住淨戒。一切功德。如是虛空界盡。衆生界盡。衆生業盡。衆生煩惱盡。我懺乃盡。而虛空界乃至衆生煩惱不可盡故。我此懺悔無有窮盡。念念相續。無有閒斷。身語意業。無有疲厭。復次善男子。言隨喜功德者。所有盡法界虛空界。十方三世一切佛

刹極微塵數諸佛如來。從初發心。爲一切智。勤修福聚。不惜身命。經不可說不可說佛刹極微塵數劫。一一劫中。捨不可說不可說佛刹極微塵數頭目手足。如是一切難行苦行。圓滿種種波羅蜜門。證入種種菩薩智地。成就諸佛無上菩提。及般涅槃。分布舍利。所有善根。我皆隨喜。及彼十方一切世界。六趣四生一切種類。所有功德。乃至一塵。我皆隨喜。十方三世一切聲聞。及辟支佛。有學無學。所有功德。我皆隨喜。一切菩薩所修無量難行苦行。志求無上正等菩提。廣大功德。我皆隨喜。如是虛空界盡。衆生界盡。衆生業盡。衆生煩惱盡。我此隨喜。無有窮盡。念念相續。無有間斷。身語意業。無有疲厭。

復次善男子。言請轉法輪者。所有盡法界虛空界。十方三世一切佛

刹極微塵中一一各有不可說不可說佛刹極微塵數廣大佛刹一
一刹中念念有不可說不可說佛刹極微塵數一切諸佛成等正覺
一切菩薩海會圍繞而我悉以身口意業種種方便殷勤勸請轉妙
法輪如是虛空界盡衆生界盡衆生業盡衆生煩惱盡我常勸請一
切諸佛轉正法輪無有窮盡念念相續無有間斷身語意業無有疲
厭。

復次善男子言請佛住世者所有盡法界虛空界十方三世一切佛
刹極微塵數諸佛如來將欲示現般涅槃者及諸菩薩聲聞緣覺有
學無學乃至一切諸善知識我悉勸請莫入涅槃經於一切佛刹極
微塵數劫爲欲利樂一切衆生如是虛空界盡衆生界盡衆生業盡

衆生煩惱盡。我此勸請無有窮盡。念念相續。無有閒斷。身語意業。無有疲厭。

復次善男子。言常隨佛學者。如此娑婆世界毗盧遮那如來。從初發心。精進不退。以不可說不可說身命而爲布施。剝皮爲紙。析骨爲筆。刺血爲墨。書寫經典。積如須彌。爲重法故。不惜身命。何況王位。城邑聚落。宮殿園林。一切所有。及餘種種難行苦行。乃至樹下成大菩提。示種種神通。起種種變化。現種種佛身。處種種衆會。或處一切諸大菩薩衆會道場。或處聲聞及辟支佛衆會道場。或處轉輪聖王小王眷屬衆會道場。或處刹利及婆羅門長者居士衆會道場。乃至或處天龍八部人非人等衆會道場。處於如是種種衆會。以圓滿音。如大

雷震。隨其樂欲。成熟衆生。乃至示現入於涅槃。如是一切我皆隨學。如今世尊毗盧遮那。如是盡法界虛空界十方三世一切佛刹。所有塵中一切如來。皆亦如是。於念念中。我皆隨學。如是虛空界盡。衆生界盡。衆生業盡。衆生煩惱盡。我此隨學。無有窮盡。念念相續。無有間斷。身語意業。無有疲厭。

復次善男子。言恆順衆生者。謂盡法界虛空界十方刹海所有衆生。種種差別。所謂卵生胎生溼生化生。或有依於地水火風而生住者。或有依空及諸卉木而生住者。種種生類。種種色身。種種形狀。種種相貌。種種壽量。種種族類。種種名號。種種心性。種種知見。種種欲樂。種種意行。種種威儀。種種衣服。種種飲食。處於種種村營聚落城邑。

宮殿。乃至一切天龍八部人非人等。無足二足四足多足。有色無色。有想無想。非有想非無想。如是等類。我皆於彼隨順而轉。種種承事。種種供養。如敬父母。如奉師長。及阿羅漢。乃至如來等。無有異於諸病苦。爲作良醫。於失道者。示其正路。於闇夜中。爲作光明。於貧窮者。令得伏藏。菩薩如是平等饒益一切衆生。何以故。菩薩若能隨順衆生。則爲隨順供養諸佛。若於衆生尊重承事。則爲尊重承事如來。若令衆生生歡喜者。則令一切如來歡喜。何以故。諸佛如來。以大悲心而爲體故。因於衆生而起大悲。因於大悲生菩提心。因菩提心成等正覺。譬如曠野沙磧之中。有大樹王。若根得水。枝葉華果。悉皆繁茂。生死曠野。菩提樹王。亦復如是。一切衆生而爲樹根。諸佛菩薩而爲

華果以大悲水饒益衆生。則能成就諸佛菩薩智慧華果。何以故。若諸菩薩以大悲水饒益衆生。則能成就阿耨多羅三藐三菩提故。是故菩提屬於衆生。若無衆生。一切菩薩終不能成無上正覺。善男子。汝於此義。應如是解。以於衆生心平等故。則能成就圓滿大悲。以大悲心隨衆生故。則能成就供養如來。菩薩如是隨順衆生。虛空界盡。衆生界盡。衆生業盡。衆生煩惱盡。我此隨順無有窮盡。念念相續。無有閒斷。身語意業。無有疲厭。

復次善男子。言普皆迴向者。從初禮拜。乃至隨順。所有功德。皆悉迴向。盡法界。虛空界。一切衆生。願令衆生常得安樂。無諸病苦。欲行惡法。皆悉不成。所修善業。皆速成就。關閉一切諸惡趣門。開示人天涅槃。

槃正路。若諸衆生。因其積集諸惡業故。所感一切極重苦果。我皆代受。令彼衆生。悉得解脫。究竟成就無上菩提。菩薩如是所修迴向。虛空界盡。衆生界盡。衆生業盡。衆生煩惱盡。我此迴向無有窮盡。念念相續。無有閒斷。身語意業。無有疲厭。

善男子。是爲菩薩摩訶薩十種大願。具足圓滿。若諸菩薩於此大願。隨順趣入。則能成熟一切衆生。則能隨順阿耨多羅三藐三菩提。則能成滿普賢菩薩諸行願海。是故善男子。汝於此義。應如是知。若有善男子善女人。以滿十方無量無邊不可說不可說佛刹極微塵數。一切世界上妙七寶。及諸人天最勝安樂。布施爾所一切世界所有衆生。供養爾所一切世界諸佛菩薩。經爾所佛刹極微塵數劫。相續

不斷所得功德。若復有人聞此願王。一經於耳。所有功德。比前功德。百分不及一。千分不及一。乃至優波尼沙陀分亦不及一。或復有人以深信心。於此大願受持讀誦。乃至書寫一四句偈。速能除滅五無閒業。所有世間身心等病。種種苦惱。乃至佛刹極微塵數一切惡業。皆得消除。一切魔軍。夜叉羅刹。若鳩槃荼。若毗舍闍。若部多等。飲血啗肉。諸惡鬼神。皆悉遠離。或時發心親近守護。是故若人誦此願者。行於世間。無有障礙。如空中月。出於雲翳。諸佛菩薩之所稱讚。一切人天皆應禮敬。一切衆生悉應供養。此善男子。善得人身。圓滿普賢所有功德。不久當如普賢菩薩。速得成就微妙色身。具三十二大丈夫相。若生人天所在之處。常居勝族。悉能破壞一切惡趣。悉能遠離。

一切惡友。悉能制伏。一切外道。悉能解脫。一切煩惱。如師子王。摧伏羣獸。堪受一切衆生供養。又復是人。臨命終時。最後刹那。一切諸根。悉皆散壞。一切親屬。悉皆捨離。一切威勢。悉皆退失。輔相大臣。宮城內外。象馬車乘。珍寶伏藏。如是一切。無復相隨。唯此願王。不相捨離。於一切時。引導其前。一刹那中。卽得往生極樂世界。到已。卽見阿彌陀佛。文殊師利菩薩。普賢菩薩。觀自在菩薩。彌勒菩薩等。此諸菩薩。色相端嚴。功德具足。所共圍繞。其人自見。生蓮華中。蒙佛授記。得授記已。經於無數百千萬億那由他劫。普於十方。不可說不可說世界。以智慧力。隨衆生心。而爲利益。不久當坐菩提道場。降伏魔軍。成等正覺。轉妙法輪。能令佛刹極微塵數世界衆生。發菩提心。隨其根性。

教化成熟。乃至盡於未來劫海。廣能利益一切衆生。善男子。彼諸衆生。若聞若信此大願王。受持讀誦。廣爲人說。所有功德。除佛世尊。餘無知者。是故汝等聞此願王。莫生疑念。應當諦受。受已能讀。讀已能誦。誦已能持。乃至書寫。廣爲人說。是諸人等。於一念中。所有行願。皆得成就。所獲福聚。無量無邊。能於煩惱大苦海中。拔濟衆生。令其出離。皆得往生阿彌陀佛極樂世界。爾時普賢菩薩摩訶薩。欲重宣此義。普觀十方而說偈言。

所有十方世界中。三世一切人師子。我以清淨身語意。
一切徧禮盡無餘。普賢行願威神力。普現一切如來前。
一身復現刹塵身。一一徧禮刹塵佛。於一塵中塵數佛。

各處菩薩衆會中。無盡法界塵亦然。深信諸佛皆充滿。
各以一切音聲海。普出無盡妙言辭。盡於未來一切劫。
讚佛甚深功德海。以諸最勝妙華鬘。伎樂塗香及傘蓋。
如是最勝莊嚴具。我以供養諸如來。最勝衣服最勝香。
末香燒香與燈燭。一一皆如妙高聚。我悉供養諸如來。
我以廣大勝解心。深信一切三世佛。悉以普賢行願力。
普徧供養諸如來。我昔所造諸惡業。皆由無始貪瞋癡。
從身語意之所生。一切我今皆懺悔。十方一切諸衆生。
二乘有學及無學。一切如來與菩薩。所有功德皆隨喜。
十方所有世間燈。最初成就菩提者。我今一切皆勸請。

轉於無上妙法輪。諸佛若欲示涅槃。我悉至誠而勸請。
唯願久住刹塵劫。利樂一切諸衆生。所有禮讚供養福。
請佛住世轉法輪。隨喜懺悔諸善根。迴向衆生及佛道。
我隨一切如來學。修習普賢圓滿行。供養過去諸如來。
及與現在十方佛。未來一切天人師。一切意樂皆圓滿。
我願普隨三世學。速得成就大菩提。所有十方一切刹。
廣大清淨妙莊嚴。衆會圍繞諸如來。悉在菩提樹王下。
十方所有諸衆生。願離憂患常安樂。獲得甚深正法利。
滅除煩惱盡無餘。我爲菩提修行時。一切趣中成宿命。
常得出家修淨戒。無垢無破無穿漏。天龍夜叉鳩槃荼。

乃至人與非人等。所有一切衆生語。悉以諸音而說法。
勤修清淨波羅蜜。恆不忘失菩提心。滅除障垢無有餘。
一切妙行皆成就。於諸惑業及魔境。世間道中得解脫。
猶如蓮華不著水。亦如日月不住空。悉除一切惡道苦。
等與一切羣生樂。如是經於剎塵劫。十方利益恆無盡。
我常隨順諸衆生。盡於未來一切劫。恆修普賢廣大行。
圓滿無上大菩提。所有與我同行者。於一切處同集會。
身口意業皆同等。一切行願同修學。所有益我善知識。
爲我顯示普賢行。常願與我同集會。於我常生歡喜心。
願常面見諸如來。及諸佛子衆圍繞。於彼皆興廣大供。

盡未來劫無疲厭。願持諸佛微妙法。光顯一切菩提行。
究竟清淨普賢道。盡未來劫常修習。我於一切諸有中。
所修福智恆無盡。定慧方便及解脫。獲諸無盡功德藏。
一塵中有塵數刹。一一刹有難思佛。一一佛處衆會中。
我見恆演菩提行。普盡十方諸刹海。一一毛端三世海。
佛海及與國土海。我徧修行經劫海。一切如來語清淨。
一言具衆音聲海。隨諸衆生意樂音。一一流佛辯才海。
三世一切諸如來。於彼無盡語言海。恆轉理趣妙法輪。
我深智力普能入。我能深入於未來。盡一切劫爲一念。
三世所有一切劫。爲一念際我皆入。我於一念見三世。

所有一切人師子。亦常入佛境界中。如幻解脫及威力。
於一毛端極微中。出現三世莊嚴刹。十方塵刹諸毛端。
我皆深入而嚴淨。所有未來照世燈。成道轉法悟羣有。
究竟佛事示涅槃。我皆往詣而親近。速疾周徧神通力。
普門徧入大乘力。智行普修功德力。威神普覆大慈力。
徧淨莊嚴勝福力。無著無依智慧力。定慧方便威神力。
普能積集菩提力。清淨一切善業力。摧滅一切煩惱力。
降伏一切諸魔力。圓滿普賢諸行力。普能嚴淨諸刹海。
解脫一切衆生海。善能分別諸法海。能甚深入智慧海。
普能清淨諸行海。圓滿一切諸願海。親近供養諸佛海。

修行無倦經劫海。三世一切諸如來。最勝菩提諸行願。
我皆供養圓滿修。以普賢行悟菩提。一切如來有長子。
彼名號曰普賢尊。我今迴向諸善根。願諸智行悉同彼。
願身口意恆清淨。諸行刹土亦復然。如是智慧號普賢。
願我與彼皆同等。我爲徧淨普賢行。文殊師利諸大願。
滿彼事業盡無餘。未來際劫恆無倦。我所修行無有量。
獲得無量諸功德。安住無量諸行中。了達一切神通力。
文殊師利勇猛智。普賢慧行亦復然。我今迴向諸善根。
隨彼一切常修學。三世諸佛所稱歎。如是最勝諸大願。
我今迴向諸善根。爲得普賢殊勝行。願我臨欲命終時。

盡除一切諸障礙。面見彼佛阿彌陀。即得往生安樂刹。
我既往生彼國已。現前成就此大願。一切圓滿盡無餘。
利樂一切衆生界。彼佛衆會咸清淨。我時於勝蓮華生。
親覩如來無量光。現前授我菩提記。蒙彼如來授記已。
化身無數百俱胝。智力廣大徧十方。普利一切衆生界。
乃至虛空世界盡。衆生及業煩惱盡。如是一切無盡時。
我願究竟恆無盡。十方所有無邊刹。莊嚴衆寶供如來。
最勝安樂施天人。經一切刹微塵劫。若人於此勝願王。
一經於耳能生信。求勝菩提心渴仰。獲勝功德過於彼。
即常遠離惡知識。永離一切諸惡道。速見如來無量光。

具此普賢最勝願。此人善得勝壽命。此人善來人中生。
此人不久當成就。如彼普賢菩薩行。往昔由無智慧力。
所造極惡五無間。誦此普賢大願王。一念速疾皆消滅。
族姓種類及容色。相好智慧咸圓滿。諸魔外道不能摧。
堪爲三界所應供。速詣菩提大樹王。坐已降伏諸魔衆。
成等正覺轉法輪。普利一切諸含識。若人於此普賢願。
讀誦受持及演說。果報唯佛能證知。決定獲勝菩提道。
若人誦此普賢願。我說少分之善根。一念一切悉皆圓。
成就衆生清淨願。我此普賢殊勝行。無邊勝福皆迴向。
普願沈溺諸衆生。速往無量光佛刹。

爾時普賢菩薩摩訶薩。於如來前。說此普賢廣大願王清淨偈已。善財童子。踊躍無量。一切菩薩。皆大歡喜。如來讚言。善哉善哉。爾時世尊。與諸聖者菩薩摩訶薩。演說如是不可思議解脫境界勝法門時。文殊師利菩薩而爲上首。諸大菩薩。及所成熟六千比丘。彌勒菩薩而爲上首。賢劫一切諸大菩薩。無垢普賢菩薩而爲上首。一生補處。住灌頂位。諸大菩薩。及餘十方種種世界。普來集會。一切利海極微塵數諸菩薩摩訶薩衆。大智舍利弗。摩訶目犍連等。而爲上首。諸大聲聞。并諸人天一切世主。天龍夜叉。乾闥婆。阿修羅。迦樓羅。緊那羅。摩睺羅伽。人非人等。一切大衆。聞佛所說。皆大歡喜。信受奉行。

香 光 小 錄

(贈 送 品)

編著及
發刊者

呂 碧 城

校對者

法 香 居士

流通處

上海慕爾鳴路一一一弄六號

大 法 輪 書 局

(函索即寄須附郵票
外埠一分本埠半分)

上海圖書館藏書



A541 212 0011 0327B

